

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA APERILA 2026

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws



OSIGA-FEAGAIGA EFKS GLENROY



***Susuga Farani Pauga FS & Sinoi @ EFKS
Faletagaloa, Itu o Tane.***



***Susuga Ututau Tauati & Samaria Siolo @
EFKS Wainoni, Christchurch***

O LE FAASINO UPU

1. O LE LAUGA (1)	2
2. O LE LAUGA (2)	2
3. MALUMALU EFKS SALEILUA	5
4. OSIGA FEAGAIGA, SAFAATO'A UTA	6
5. OSIGA FEAGAIGA, GLENROY	6
6. OSIGA FEAGAIGA, FALETAGALOA	7
7. FA'AAOGA TATAU MEAALOFA	7
8. O I'A MAILE UPEGA	8
9. O LE SULU I VAE & MALAMALAMA	10
10. TALA O E UA MALILIU	12
11. TALA MO TAMAITI	13
12. ATA O TALA LOMIA	16

O LE LAUGA

Tusi Faitau: Mataio 11: 20 – 30

Matua: Mataio 11: 28 – 30, “*Ia outou o mai ia te a'u, outou uma o e tigaina ma mafatia i avega, o a'u foi e malolo ai outou. Ia outou amoina la'u amo, ma ia outou fa'aa'oa'o ia te a'u, auā o a'u le agamalū ma le loto maulalo, ona maua lea e outou o le malologa mo outou agaga.*”

Manatu Autu: **Tou te maua le malologa mo outou agaga.**

Upu a Iesu i a'oa'o tulafono ma ta'ita'i o le Lotu Iutaia. Tagata mafatia ia i le tausia o mau tulafono, auā e lē faigofie. Vaai ma le alofa Iesu i le pagatia o le tagata.

Mafatiaga ia na fetalai ai Iesu, f. 28-30, “*Ia outou o mai ia te a'u, outou uma o e tigaina ma mafatia i avega, o a'u foi e malolo ai outou. Ia outou amoina la'u amo, ma ia outou fa'aa'oa'o ia te a'u, auā o a'u le agamalū ma le loto maulalo, ona maua lea e outou o le malologa mo outou agaga. Aua e ave gofie la'u amo, o la'u avega foi e māmā ia.*”

Atagia i fetalaiaga a Iesu, ua sili atu le leaga o tagata i ona taimi nai lo taimi o le Feagaiga Tuai. Lea ua ia fetalai atu, ana fai ia Turo, Saitonu ma Sotoma o vavega ua ia faia i Koasini, Petesaita ma Kapanami, po ua salamō ma foi i le Atua. A e a lenei auga tupulaga, ma le lalolagi i nei ona po? Faamata e le'i

sili atu le leaga o amio a tagata i nei ona po, nai lo taimi a o i ai Iesu i lenei lalolagi?

Faamalolosi... Tatalo i le Atua e fesoasoani mai i ni auala e toe tata'i mai ai tagata ia Iesu, aemaise o le toe fanaufouina o olaga ma le mafutaga ma le Alii. Lima masina o le tatou malaga o lenei tausaga 2026. Ua oli oli mai foi le tiapolo e faasesē tatou i mea e lelei ai le galuega a le Atua.

O ai foi le tautai poto ma le tautai mata palapala... o upu masani, E poto lava le tautai a e sesē lana atu i ama. A o se faamalosi'au mo tatou. Tautai Iesu i la tatou folauga.

Lelei le poto a e 'aua le faalagolago i ai. E le faigofie le tauasa, a ua uma ona fa'aali mai e Iesu le auala e faigofie ai.

Ia outou amoina la'u amo, ma ia outou fa'aa'oa'o mai ia te a'u. Fa'aa'oa'o i lona agamalū ma lona loto maulalo. Auā e ave gofie la'u amo, o la'u avega foi e māmā ia.

O a avega mamafa, o mafatiaga o le ola nei (tino, mafaufau, agaga), e faigofie mea uma ia Iesu. Leai se mea e faigata i le Atua.

Tatalo, faatuatua i le Atua. E le gata ina malolo ai o tatou tino a e sili ona maloloina ai o tatou agaga. O lona toetu manumalo, ua tatou maua ai le malologa ma le ola ma maua atili ai lava.

Amene.

Saunia susuga Tavita Pulu FS,

EFKS Togo,

Matagaluega MALUA

O LE LAUGA (2)

Tusi Faitau (30 Aperila 2026): Mataio 10: 11 – 23

Matua: Mataio 10: 16 – 18, “*Faauta, ou te aau atu ia te outou e pei o mamoe i le va o luko; o lenei, ia outou atamamai e pei o gata, a ia fifilemu e pei o lupe. Ia outou ma tagata; auā latou te tuuina atu outou i fono, ma latou sasa ia te outou i o latou sunako. E ta'ita'iina atu foi outou i luma o alii ma tupu ona o a'u, e fai ma molimau ia te i latou atoa ma nuu ese.*”

Manatu Autu: **O MEAE ONO TUTUPU**
(What to expect)

O le muagagana faapapalagi e faapea, Expect the unexpected (Ia saunia mo mea e lē fuafuaina). A o

upu a le atunuu, Ia ‘aua ne’i faamanupo’ia i ofaga. E mafua mai le manulele, pe afai e paiē e lele ese atu e saili ana mea’ai, a e fiafia e nofonofō i le mafanafana o lona ofaga; e maua atu e isi manu po o tagata, ona pu’e lea ma faatama’ia, i totonu o lona lava ofaga. O lona uiga, ia ‘aua ne’i faate’ia, i le faafuase’i ona tula’i mai faafitauli, a e le’i saunia i ai. A e afai foi e sauni se malaga, e masani ona faapea upu, Ia tapena ia lava, o le a motu ma le taula. O le a folau faatafae e pei o le vaa ua leai se taula. O lona uiga foi lea, ia sauniuni ma tapena ia lava, auā e lē iloa mea e ono tutupu mai.

Atonu o le mafuaaga lea, e masani ai matua, pe a sauni le fanau i le a’oga, ona latou apoapoa’i ma faatonu fanau ina ia mataala i taimi uma, e lē gata o le savaliga i luga o le auala tele, a o luga foi o malae taalo, ma totonu o potu a’oga. O le uiga o nei faatonuga ma lapataiga a matua, ia saunia lelei le fanau, mo mea e ono tutupu mai; o ni faalavelave, aemaise o ni mailei a le fili, po o faaososoga a le tiapolo, e lamatia ai i latou; o mea e ono fai ma faatupu mala, i lo latou ola tauivi ma le sailiga o le poto. E faapea foi i soo se ta’ita’i, i apoapoaiga e fai i lana vaega’au – po o fitafita sauni i le taua, po o se au taalo i soo se tausinioga, tainane se aufaigaluega i tiute ma faiva. E lapata’i ma faamalosi’au, i mea e ono tula’i mai, ina ia nofo uta ma sauniuni lelei i ai. Ia ‘aua le maua faamanupo’ia i ofaga.

O le mataupu e 10 o le Evagelia a Mataio, o loo auina atu ai e Iesu ona soo e to’asefulu ma le toalua, e tala’i atu, le oo mai o le Malo o le Atua, ua latalata mai le Malo o le Lagi. O Iesu Keriso lava lea, ua afio mai, ma ua mau faatasi ma tagata. E tele apoapoaiga a Iesu i ona soo, i le faiga o la latou galuega. I tagata e fai i ai, e lē o nuu ese poo Samaria, a ia amata ma faamuamua, e faasino tonu i mamoe o le aiga o Israelu ua leiloloa. Latou te faamalolo i e mama’i, faatutū i e ua oti, faamamā lepela, ma tutuli i temoni. Latou te faia vavega, auā ua tuuina atu i ai e Iesu le pule ma le paoa, o le mana o lona Agaga Paia. Ua latou maua fua lea faamanuiaga, ia faapea foi ona latou ofo fuaina atu. ‘Aua le vaavaai i se tau; ‘aua ne’i ave se taga e faaputu ai tupe, o auro mario. Na faatonuina foi ina ia ‘aua le mamapo i la’ei ma teuga, o vaaiga i le itu i le tino, ‘aua foi le popole i le tausiga o i latou, e saunia lava ia mea e tagata alolofa. Ia faamanuia atu i e alolofa mai, a ia tū tū

ese atu foi le palapala e pipii mai, i fale ma aai o tagata latou te teena la latou talaiga; ina ia ‘aua ne’i pipisi faa-faama’i lo latou loto leaga, ma le tete’e i le Tala Lelei.

Ona oo mai lea o faatonuga a Iesu, e pei ona i ai i le Tusi faitau o le aso mulimuli o lenei masina, i le vaega e pei ona fai ma matua, *“Faauta, ou te auu atu ia te outou e pei o mamoe i le va o luko; o lenei, ia outou atamamai e pei o gata, a ia fifilemu e pei o lupe. Ia outou ma tagata; auā latou te tuuina atu outou i fonu, ma latou sasa ia te outou i o latou sunako. E ta’ita’iina atu foi outou i luma o alii ma tupu ona o a’u, e fai ma molimau ia te i latou atoa ma nuu ese.”*

O apoapoaiga ina ia mataala ma sauni lelei, auā e tele mea e ono tutupu mai, o mea e lamatia ai lo latou ola, e lamatia ai foi le talaiga o le Malo o le Atua. O le galuega e lē faigofie, a e sili ona faigata. Ua faatusa ai le au soo i mamoe, o manu filemu, e leai se malosi e faasagatau atu ai pe tetee atu i manu fe’ai; o manu e faigofie ona sē ese ma leiloloa, pe afai e fefe ma faavaivai. E faapena ona faatusa i ai le ma’ale’ale o le soifuaga faasoo o Keriso, le soifua molimau faaKerisiano, ma tagata faatuatua ia Iesu, e lamatia e le fili i taimi uma.

Na manino lelei Iesu, talofa e, o ona soo e pei o mamoe i le va o luko. Ua faatusaina fili o le galuega i luko, e fe’ai, e faaitualalua, o latou nifo e gū ua sauni e saeia ma faaumatia; faatusa i ai le matamata ita mai o le lalolagi, o loo fai i ai le talaiga o le Tala Lelei. O le faatusa i le tiapolo ma ana ‘au, le fili i soo se foliga, o le faigatā ma le lavelave o le galuega tala’i. E faamatala ai le ogaoga o faafitauli, e lamatia le ola e oo lava ina fasiotia ai. Ua silafia e Iesu, le sauni mai o le Lotu Iutaia, i ona ta’ita’i o faresaio ma tusiupu, o toeaina ma ositaulaga, e faasagatau mai ma tetee mai ia te Ia. Aemaise lava i le mau, o Ia le Tamai Mamoe a le Atua, o le Keriso, le Alo o le Atua soifua.

Ui i lea, ua Ia apoapoa’i ma faamalosi’au, i auala e saunia lelei ai le aufaigaluega, pe a tutupu mai pefea, ina ia manuia le talaiga. O a ia auala? *Ia atamamai e pei o gata, a ia fifilemu e pei o lupe.* O le atamai pei o le gata, e lē o le poto leaga faitogafiti o le gata, sa faasesēina ai Eva. A o le poto ma le atamai, ua

a'oa'oina lelei i afioga paia a le Atua, o le sulu ma le malamalama. O le atamai e fa'aaoga ai le mafaufau lelei, e fetu'utu'una'i muniao, i le upu e fai atu, o le gaiouga ma faai'uga e fai, ina ia faigofie ona momoli le fe'au, faigofie foi ona talia lelei mai. O le atamai e alofa ma fa'aaloalo ai i tagata, e faa'ele'elea ma sosolo i lalo i le agamalū ma lotomaulalo, e faamagalo atu. O le fa'aaogāina o le tofa faatamalii, ma le utaga fetāla'i, ae lē o le atamai e 'alo ese mai, potō e sola ese mai tiute e tatau ona faataunuu.

E atamai e pei o le gata, a e filemu e pei o le lupe. O lona uiga, ia faia le galuega i auala o le filemu, auala mamā ma le paia, auala malamalama, 'aua ma le lualuagia i auala pi'opi'o ma faatogafiti. Ina ia 'aua le uia auala o le faavevesi, o le fai faamalosi ma auala faasauaga, auala o le faapologa ma soona faae'avega lē talafeagai i luga o tagata; a o auala o le filemu, e maua ai le nofo lelei ma le fealofani. E lē o le fifilemu a le paiē e faamoemoe i mea maua fua ma le filemu; e lē o le filemu a le fefe ma faavaivai. A o le filemu faalagolago i le Alii e ana le galuega. O la le perofeta o Sakaria, *O le afioga lenei a le Alii ia Serupapelu, o loo faapea mai, E lē o le fitafita, e lē o le malosi, a o lo'u Agaga, ua fetalai mai ai le Alii o 'au.* Lona uiga e lē faia le galuega i se ma'ema'e o le tagata, o le a sona malosi faaletino, i le potō ma le tamaoauga, a o le malosi o le soifua tatalo ma le ola faapaiaina, e auala mai ai le mana o le Agaga Paia.

O le valaauina ma le auina atu o le ausoo, o lo tatou valaauina faatasi lava lea, i le avea ma kerisiano faatuatua ia Iesu Keriso. O tatou tofi ma tiute ua galulue ai, i totonu o aiga ma nuu, i le Malo ma le lalolagi, aemaise i totonu o le Ekalesia, o lo tatou tala'i atu lava lea o le Malo o le Atua. E tala'i atu i le upu folafola, e tala'i atu i le amio mamā ma le ola faapaiaina, le ola mata'u i le Alii, e fai le alofa, le amiotonu, usita'i ma faamaoni. O le olaga e 'alo ese mai soliga tulafono, a e fai le finagalo o le Atua. E tala'i atu e ala i le soifua galue, le soifua osi taulaga, auaua ma tautua i le loto faafetai, e faailoa atu ai ua faaolaina i tatou e Keriso.

O se soifuaga e faigata, auā e faaosoosoina tatou i taimi uma; e mana'o le tiapolo - o ituaiga luko eseese – ina ia 'aua tatou te usita'i ia Keriso, a e ia tatou pa'u'ū atu i ona ala leaga e fano ai. Manatua foi, na amata mai lava i totonu o le li'o o le au soo, i latou

na auina atu, na tausolomua i e sa militino, sa feoa'i faatasi ai ma luta le Sekara, e tino mai i mamoe, a o totonu o le luko faalata fasioti tagata. Ma isi soo pei o le fanau a Sepetaio, sa saili tulaga mamalu ai, i le avea ma soo? Pe le o le ata foi lea o le ekalesia a Keriso? O loo i totonu lava o le lotoifale o le ekalesia, le fili sauā o le galuega a le Alii?

O se feau faamanatu lenei mo le EFKS, ina ia mataala ma nofo sauniuni mo suiga tetele ua tula'i mai, ma e ono faateteleina, a o gasolo lana galuega ma le malaga faalefaatuatua. Ina ia toe silasila ifo i lana misiona, poo avea ma tino vaaia o Keriso i le lalolagi, po o fai ma tino vaaia o luko feai ma gata uogo, o fai ma fili o le Tala Lelei. Aemaise lava i le vasega o ta'ita'i, o laulau a fono ma le saofaiga a komiti, i latou o faia tonu ma faai'uga fai. I latou o i ai le pule ma le paoa i itutino o le ekalesia. Auā ua o ese pea tagata lotu, ma nisi aulotu, ua fulitua mai i le EFKS, ona o le fe'ai ma le sauā, o le sesē ma amiolētonu, o le faaitu'au ma le faailoga tagata, o faai'uga fai.

E fia maua se ekalesia e faamamafa lana misiona i le itu faaleagaga, ia maua agaga o tagata, a e le o le tuulafoa'i o tagata e pei o mamoe ua leai se leoleo mamoe, a e mua ona saili o latou lava tulaga mamalu ma tamaoauga, e mua ona saili po o fea o fai ai ni sauniga ma faalavelave. Soia ia le faamamafa i le sailiga o oloa ma mamalu faalelalolagi. Mata o le itu foi lea e saga 'apo'apo ai e nisi le aganuu ma ana fa'aaloaloga, fiafia e tautoalua ma le galuega a le ekalesia, fai ai ma le molimau sesē fai mai e faamamalu e le aganuu le Tala Lelei! – ona e taumasuasua ai lu'uga o tupe, toga, palapala malo a isi toaitiiti, a o loo matitiva ma tau totogi aitalafu a le toatele o nisi. E le'i faamamaluina lava e le aganuu faafaresaio ma tusiupu a le lotu Iutaia, le talaiga a Iesu, a e sa avea ma fili malosi e faalavelave ma faatausui i le galuega faaola a Keriso.

Fai mai le upu talasua, Ua tele lava le suiga o Samoa i nei aso. E sa'o, ua tele ma anoanoa'i mea e ono tutupu. O suiga sa le'i masani ai, suiga tatou te le'i vaai i ai, suiga e mafua mai ona ua faavaivai la tatou molimau i le Tala Lelei. E pei o osiga feagaiga a aulotu, ua amata ona fai e pei o faalavelave faaleaganuu i saofa'i a matai, ua fai i le vaveao, fai i le Aso Sa, ina ia 'alofia ai le toatele e auai ma molimau i faamoemoga lelei. O le a faateleina pea

faiga ma suiga fou, e ao ai ona nofo tatalo mataala ma tapena mamao le ekalesia.

A o le tulaga i le auunaga ma osiga taulaga i le agaga faafetai ma viiga i le Atua, e ao ona faatuputeleina pea, ia siisii pea i luga lona lelei ma lona aofa'i, 'aua le mapu i le faaneene. Ua aga atu i le Fono Tele, ma galuega faai'u o lenei tausaga. O osiga taulaga e tatau, a e ono avefa ma avega mamafa, e avefa ma pa pupuni, o lo tatou ola molimau, pe a faavaivai. Ua faamalosi mai lo tatou Matai, lo tatou Alii o Iesu, e ui i nei faigata uma, a e leai se mea e lilo i lana silafaga, e leai foi se mea faigata ia te Ia. O a faigata, faafitauli ma faaosoosoga, 'aua tatou te popole pe atuatuva, tau ina faamalolosi pea ma le faatuatua, o loo faatasi mai pea o Ia. Ua ia te Ia le pule aoao, ua ia te Ia le manumalo. Ua fetalai o Ia, "*E maua outou e le puapuaga i le lalolagi, a ia outou loto tetele, ua ou manumalo i le lalolagi. Faauta foi, ou te ia te outou i aso uma lava, e oo lava i le gataaga o le lalolagi.*"

Le paia e, o le Ekalesia ma le au faitau Sulu Samoa, e lē mafaitaulia le tele o mea na ono tutupu i le soifuaga o lo tatou Alii o Iesu, o mea leaga ma le matuitui na fai e le tiapolo. Peita'i e leai se mea na le'i sauni ai o Ia; e leai foi se auala a le tiapolo na toilalo ai o Ia. O a faiga taufaamata'u, faiga tau faasesē a Iutaia ma Roma ma le lalolagi, na lava tapena ma lelei saunia o Ia ma manumalo ai, auā sa faamoemoe ma faalagolago i le ta'ita'iga a lona Tama i le Lagi.

O ona puapuaga, o lona maliu tiga i le satauro, sa le'i faate'ia ai o Ia, na te le'i faameo pe agasala ai, ae na Ia sauni ma talia lelei ma le loto maulalo, ona o lona silasila alofa ia i tatou, ia magalo a tatou agasala, ma tatou sao i le ola faavavau. Ua toetu manumalo o Ia, mai le oti ma le tuugamau; o lo tatou manumalo foi lea, i la tatou molimau ma le mulimuli atu ia te Ia, pe a tatou salamō faamaoni, ma faatuatua atoatoa ia te Ia. Ia manuia le alo atu i lona masina ma ona feau faapitoa, o le Aso Sa Tina ma le Fono Tele. Ona o Iesu. Amene.

Saunia e Faitoaga Tolua FS
(Faatonu Sulu Samoa)
FNA, EFKS Ululoloa ma Siusega
FALEATA

FAAPAIA MALUMALU FOU **EFKS SALEILUA, FALEALILI**

O le malumalu fou o le EFKS Saleilua, Falealili ua faasuaafaina o le **TAEAO FOU O LE TALA LELEI**, na faapaia i le Aso Faraile, 17 Aperila 2026. O le ekalesia lea o loo tausaga e le susuga Risati Taua FS ma le faletua ia Suitupe. O le Toeaina o le Pulega Falealili, susuga Tunumoso Soliola Iosia FT na ia ta'ita'i le sauniga, i lona faasologa masani ai e tusa o le faasinoga a le Tusi Failotu, Ia Vii Lou Suafa. Na muamua ona faafeiloa'i le mamalu o le faapotopotoga, ona ooti lea o le lipine e le afioga i le faletua ia Susana Tunumoso Iosia. Na tauaao mai KI o le Malumalu e le afioga i le Matuaofaiva, ona tatala ai lea o faitoto'a ma ulufale le paia maua luga o le au valaaulia, aemaise le ta'ita'i o le sauniga ma le au mau tofi. O lenei malumalu ua suia ai le Falesa tuai na fausia i le 1916.

O le Tusi Paia na faitauina e le susuga Meafou Ah Ching FS (EFKS Satalo), o Tatalo na saunoa i ai le susuga Vaigafa Paleono FS (EFKS Vaovai) a o le Lauga na saunia e le susuga Momo'e Gagaeolo FS (EFKS Siuniu). O le Tala o le Galuega na fofogaina lava e le susuga i le faafeagaiga ia Risati, ma ta'ua ai le tau o le galuega e tusa ma le **\$1,340,000+**. (E oo mai i le taimi o le lomiga o lenei Sulu Samoa, e le'i maua mai se Tala Otooto o le Galuega). O se galuega matagofie tele ma saunia lelei. O le afioga i le Failautusi Aoao o le Ekalesia, susuga Dr. Taipisia Leilua FS, na ia saunoa e fai ma sui o le Laulau Fono Tele ma le Ekalesia Aoao, e faaleo le faamalo ma le faafetai i le Faafeagaiga ma le Ekalesia i Saleilua, mo le galuega tele ma matagofie mo tapuaiga ma sauniga lotu a le ekalesia. Na ia ofoina atu ai le meaalofa tupe e \$20,000 a le Ekalesia Aoao e tusa ma ana faiga faavae. Sa le'i auai le afioga Taitaifono o le Fono Tele, le Sui Taitaifono ma le Teutupe, faapea le Laulau a le Komiti Au Toeaina, i lea aso taua, ona sa feagai i latou ma fonotaga i atunuu mamao.

O le Toeaina o le Pulega Siumu ma Safata, susuga Kereta Fuafiva FT, na valaaulia faapitoa na te ta'ita'i le Sakarameta o le Faamanatuga. O le susuga ia Kereta ma le faletua ia Faafetai, ua sauni nei mo lo la'ua Penisione i le Fono Tele o le tausaga nei, aulia i le alofa o le Atua. Ona tauluga lea o le aso i osiga taulaga masani, i tausamiga ma fa'aaloaloga maua luga. Faafetai. Malo le galulue. ***Vi'ia le Alii.***

OSIA LE FEAGAIGA A LE EFKS SAFAATO'A - UTA

Sa faataunuuina le faamoemoe o le EFKS Safaato'a uta, i le osia o la latou feagaiga ma lo latou faifeau, susuga Vauea Esau ma lona faletua ia Susi, i le Aso Faraile 24 Aperila 2026. O le Toeaina o le Pulega Lefaga ma Faleaseela, susuga Tuitoga Leota FT na ia ta'ita'i le sauniga ma osia le feagaiga i le va o le faifeau ma le faletua, ma le Ekalesia i Safaato'a uta. O le Tusi Paia na faitauna e le susuga Ioane Samuelu FS (Matautu tai Lefaga), a o le Lauga na saunia e le susuga Francisco Fatu FS (EFKS Gagaifo uta).

Na molimau le sui o le ekalesia e tusa ma la latou filifiliga i le sailiga o so latou tofi, sa faia lava e tusa ma aiaiga ua faasino mai e le faavae o le ekalesia, e filifili saoloto ma faamoemoe i le ta'ita'iga a le Agaga Paia, o la na te tofofi mai. Na ia ta'utino foi le nofo sauni o lo latou aulotu ma le nuu, e tausi lelei le auuuna a le Atua ua valaauina mo le tausiga o lana lafu mamoe i totonu o lo latou nuu. Na ia folafola mai foi o le a latou galulue faatasi ma le faifeau, ina ia sologa manuia le galuega a le Atua, ma ia maua agaga o le lafu mamoe, mo le viiga o le Atua.

Sa faapea foi ona molimau le susuga i le faifeau filifilia e tusa o la la'ua taliaina o le valaau. E maualuga le loto faatauvaa e vivii ma faafetai i le Atua, e ala i le faatofalaiga a le ekalesia nei, ua valaauina ai mo le galuega tausi nuu - o le faamoemoe maualuga lea na a'otauina ai i Malua. Sa faafetaia foi le tapuaiga a matua ma aiga, o nuu ma matua faaleagaga, mo le nofo tatalo i aso uma, ina ia fa'aaoga e le Atua lo la'ua ola mo lana galuega. Sa faapea foi ona folafola lo la'ua faamoemoe tasi i le fesoasoani mai o le Atua la te mafaia ai. E maualuga foi le faamoemoe o le a latou galulue faatasi ma le ekalesia, e manuia ai le galuega.

Na silatoga foi le faapotopotoga i le IE o le Feagaiga na saunia e le ekalesia, ma tauaao atu i le faafeagaiga ma le faletua e teuina, seia toe tala pe a oo ina tatalaina lenei feagaiga i le oti, po o le aulia o le penisione, po o se tasi mafuaaga e tatau ai e tusa ma le Faavae ma Iugafono Tumau a le Ekalesia. O le susuga Vauea ma Susie na i'u mai Malua i le tausaga 2021, a e faau'uina i le tofi Faifeau Samoa i le Fono Tele 2024. Ua sui tulaga atu i la'ua i le galuega i Safaato'a uta, ina ua maliu le Toeaina Faatonu, susuga Nomeneta Simanu FT i le aso 5 Tesema 2024. Ia manuia tele le galuega o le a feagai ai ma le faifeau ma lona faletua.

OSIGA FEAGAIGA EFKS GLENROY, VITORIA

Na osia le feagaiga a le EFKS Glenroy ma le A'oa'o i'u mai Malua, i le Aso Toona'i 11 Aperila 2026, itulā 10am. Sa faataunuuina lava i le Malumalu o le Ekalesia: "PUPULA O LE FAAOLATAGA", 83 Mason Street, Campbellfield, Melbourne Australia. Suafa o le a'oa'o o Fetu Fetu AM ma le faletua o Ilaisa Fetu, e to'atolu le fanau. O le A'oa'o e mai le afioaga o Laulii, Poutasi, Vavau ma Saipipi, a o le EFKS Otahuhu, Matagaluega Manukau sa lolotu ai, o le faletua e mai Moata'a, Saleimoa ma Safune, a o le EFKS Tullamarine, Matagaluega Vitoria sa lolotu ai.

O le sauniga sa ta'ita'i e le Faifeau Toeaina o le Pulega Melepone Tutotonu, susuga Iaeva Lagaia FT. ma ia faatinoina le Faamanatuga ona e le'i faau'uina le a'oa'o. O le au maotofi: faitau Tusi Paia Lopati Toleafoa FS, Tatalo Leituala Faamatala FS., Lauga Onesemo Mareko FS. O le sui o le aulotu na saunua o le Tiakono Fanaea Vaitoelau Ai'i. Sa momoli le Ietoga o le osiga o le feagaiga na saunia e le aulotu, ina ua alala uma le mamalu na auai mai i le hall/maota o le galuega.

O le EFKS Glenroy na faatuina 30 Aokuso 1995, o le ulua'i faifeau o le Susuga ia Paul Gray FT. & faletua ia Taualogomai Gray, sa galulue mai ai seia aulia lo la tausaga penisione 2025 i le Fonotele i Malua e pei ona usita'ia ai i'uga a le Ekalesia Aoa. O le faifeau lona lua lea o Fetu Fetu AM ua osia le feagaiga ma le Ekalesia.

Sa auai mai le Ta'ita'ifono a le Matagaluega Vitoria, Susuga Viliamu Finau FT. ma le faletua ia Nellie, ma nisi e to'atele. O le maopopoga na molimauina i le galulue faatasi o le aulotu ma fanau faale-Agaga na au tova'a mamao mai, Susuga ia Kolia Fiu FS. & faletua ia Lila, Susuga ia Kamuta Mata'afā FS. & faletua ia Makerita. Toatele aiga, ma uō i le Talalelei, aemaise le paia i aiga na lua o Fetu ma Ilaisa malaga mai e lagolago le faamoemoe. Tele le tamaoiga ma tapenaga na foa'i ma fai meaalofoa atu ai, sa faatofutofusia ai. O taumafa, tupe, toga, o ato o meaalofoa e faamanatu ai le faamoemoe o i ai fusiua, scarves, o ili, kola auro, pusa Easter eggs, ae taualuga i le faa-aiaivā tele a le Mafutaga a Tinā Glenroy sa agalelei ai mo aiga na lua. Viia le Atua i Lona alofa tele mai i ala matagofie eseese. Faafetai faafetai.

OSIGA FEAGAIGA EFKS
FALETAGALOA, ITU O TANE

O le uluai aso o le masina o Aperila na faataunuu ai le sauniga paia o le osiga feagaiga a le EFKS Faletagaloa, Safune Savaii, ma lo latou faifeau susuga Farani Pauga FS ma le faletua ia Sinoi. O le Toeaina o le Pulega Gagaifomauga, susuga Tanielu Apineru FT na ta'ita'i le sauniga ma osi le feagaiga. O le susuga Mani Nepo FS (EFKS Fatuvalu) na saunia le Tatalo, a o le susuga Penaia Europa FS (EFKS Aopo) na saunia le Lauga. O le sauniga na faatumulia i le mamalu o le Ekalesia - le afioga Sui Taitaifono Fono Tele a o le Toeaina o le Pulega Gaga'emauga, susuga Palemia Tauiliili FT ma le faletua, o le Komiti Faatonu ia Amuia Seuata FT, le Toeaina ia Uta Muaulu FT o le Pulega Malua Sisifo, le Toeaina ia Iakopo Leleimalefaga FT ma le faletua, o i latou lava foi nei sa fai ma sui o le Ekalesia Aoao, le Matagaluega ma le Pulega, e faafeiloa'i aloaia e ala i le faatalofa i le faifeau ma le faletua. Sa auai foi nisi o le aufaigaluega o le Pulega ma le Matagaluega Itu o Tane, o aiganalua faapea uo ma aumea a le faifeau ma le faletua.

O le susuga Farani Pauga na a'otauina i le Kolisi Faafaifeau i Malua mai le tausaga 2011 ae faai'uina i le 2014. Na galue i le Matagaluega A'oa'oga Kerisiano e fai ma Ofisa o le Matagaluega Malua mai le 2016 - 2023, na faauu i le tofi Faifeau Samoa i le 2018, ae galue i le Fono Faavae o le itumalo Aana Alofi i le 2024 seia oo ina valaauina e le EFKS Faletagaloa. O i la'ua e mai afioaga o Fasitoota ma Utalii. Ua sui tulaga atu i la'ua i le galuega i Faletagaloa sa i ai le susuga Vaueli Sanerivi FS, a o tua atu sa galulue ai le susuga Seilala Tofa FS (na maliu o galulue ai ma le faletua ia Vaasiva), na sosoo atu i le susuga Misipati Tuiloma FS ma Folole.

Na tualuga le sauniga o le osiga feagaiga i le Sakarameta Paia o le Faamanatuga na ta'ita'i e le susuga Farani. Sa folasia foi le IE o le Feagaiga na saunia e le mamalu o le Ekalesia, ma tauaao atu e teuina malu e le faifeau ma le faletua i le maota o le galuega. Ona afe ane lea o le Taitai o le Sauniga, le Laulau o le Fono Tele, susuga Toeaina ma latou faletua, o le aufaigaluega galulue, o aiganalua uo ma aumeamamae, e tali le fa'aaloalo maualuga a le EFKS Faletagaloa e ala i taumafataga ma fa'aaloaloga faaleaganuu e masani ai i aso tetele faapenei. Malo faafetai. Ia manuia le galuega. Ia viia le Atua.

FA'AAOGA MEA NA AVATU
E LE ATUA IA TE OE

“³⁸Ona faaofu lea e Saulo ia Tavita i ona ofu, ua faapulouina lona ulu i le pulou 'apa memea...ufifatafata uamea...pelu. ³⁹Ona fai mai lea o Tavita ia Saulo, “Ou te lē mafai ona alu ma nei mea, auā ou te le'i masani ai.” Ona tuu ese ai lea e Tavita o nei mea nai ia te ia. ⁴⁰Ua ia ave lona tootoo i lona lima, ma ua filifili i maa lamolemole e lima nai le alia...ma le maatā i lona lima; ona faalatalata atu lea o ia i le Filisitia.” 1 Samu 17.

O le taimi na fai ai le filifiliga a Tavita; le filifiliga e faalagolago i ai lona lumanai. E mafai ona alu i le taua o ia o Saulo - e laei i ofu tau o Saulo, o lona pulou, o lana pelu ma le tao ma le talitā a Saulo. Pe alu i le taua o ia o Tavita, le tama leoleo mamoe ma lana fana lialia'i, le maatā.

Na filifili Tavita na te lē ofuina ofutau o Saulo, pe pulou i le pulou'apa, o le pelu ma le talitā, ona o le mafuaaga lelei e tasi; e lē o ia o Saulo. Na filifili Tavita e alu atu e fesaga'i ma le fili, o ia lava o Tavita – le tama na valaauina e le Atua, faauu e Samuelu, ma ua faaupegaina e le Atua mo lana galuega. E i ai taimi o le soifuaga tatou te manaomia ai le loto tetele e tuu ese ai laei ma ofutau o Saulo. Ma e manaomia ai le ituaiga lototele maua gatā, le lototele ia avea ai oe o oe mo'i. Tatou te amata uma o ulua'i foafoaga, peitai o le toatele o i tatou e uma ane ua avea ma kopi poo faata'ita'iga o isi tagata. Ua lē faamamaluina lo tatou tulaga ese, ma le tulaga ese o isi tagata, a ua pei ua avea ma mea e taufaafefe mai. Ua tuulafoa'i lo tatou tulaga ese ona ua tatou manana'o e faafetai i tatou i totonu o saofaiga.

Fai mai se tasi tusitala lauiloa, “E i ai le taimi i le a'oa'oina o soo se tagata, na te taunuu atu ai i le ta'utinoga e faapea...o le faata'ita'i faafoliga o le pule lea i le ola. E ao ona ia avea o ia o lona lava lea tagata mo le mea sili, po o le mea faigata.” O le mea lena na fai e Tavita, ma avatu i ai e le Atua le manumalo. Ma o le mea foi lena e finagalo le Atua mo oe e te faia.

O I'A MAI LE UPEGA

“Au mai ia nisi i'a ua outou maua nei.”

ANANIA ma SAFAIRA (Gal. 5: 1 – 11)

O le i'uga o Anania ma Safaira sa mafai ona lavea'i iina; o se tasi o lapataiga tāua mai le Tusi Paia. O lo la'ua tala ua faailoa mai ai, o nisi amioga leaga ma agasala e manatu tagata e itiiti ma faatauvaa, a e sili ona mata'utia i le silafaga ati ma le faafofoga paia a le Atua. O le toatele e fefefe i aitu ma temoni, o mala ma osofaiga, a e latou te manatu māmā i le faafofoga, taufaasesē, taufaa'ole'ole, faamaualuga, mitamita vale ma le faatagā lelei i luma o le Atua. Peitai o nei agasala natia e mafai ona latou faaumatia ai le tagata, e sili atu ona vave nai lo le fili e fai lona tino.

AISEA NA VAVE MALILIU AI?

O se fafagu lelei mo tagata uma. O le mea na tupu i ulua'i aso o le amataga o le ekalesia, o taimi o le malosi o le fegaoioia'i o le mana ma le paoa o le Alii i ona tagata faatuatua. Sa tupu ma ola le ekalesia, sa tutupu vavega, tuufaatasia tagata, o le toatele sa faatau a latou mea totino e fesoasoani i tagata matitiva. O le vaitau o le loto māmā, faafetai, olioli, ositaulaga, alofa ma le tapua'i faamaoni i le Atua.

Sa aofia ai ma le tamaloa o Anania ma lana avā o Safaira. Na faatau lo la'ua fanua; e leai se mea e sesē i le faatauina o le fanua, o la la'ua mea totino. E leai foi se mea sesē i le taofia ai o se vaega o le tau o le fanua. O lo la'ua fanua, o la la'ua tupe. O le faafitauli e lē o le aofa'i o tupe.

O le faafitauli, o lo la'ua taufaasesē. Na la'ua malilie faatasi e taofi faananā, se vaega o le tupe, a e ave le mea na totoe i le au aposetolo, e peisea'i o le tupe atoa lena.

Na la'ua manana'o i le mamalu o le osigataulaga, aunoa ma le tau o le osi taulaga. Na mana'o i foliga o le faapaiaina, aunoa ma le faapaiaina moni.

“A ua fai atu Peteru, ‘Anania e, se a le mea ua faatumu ai e Satani lou loto e te pepelo ai i le Agaga paia, ma e tuu ai mo oe nisi mea o le tau o le fanua?’”

O lona uiga o le la'ua agasala e lē na o le va ma tagata. A o le agasala i le va ma le Atua.

E toatele tagata e manatu e mafai ona latou faasesēina le ekalesia, faasesē ona ta'ita'i, le sosaiete, ma saogalemu mai ai. Peitai e leai se tasi na te faasesē

pe faase'e le Agaga Paia. E silafaga ati le Atua i tala atu o foliga ma faafofoga. Na te silafia le mafuaaga, le faavae e faia ai se mea, o mea lilo natia, o fuafuaga ma maliliega i o tatou loto.

Ma maliliu vave i la'ua ona e finagalo le Atua e ta'u atu se feau taua ma se lapataiga malosi i le uluai ekalesia, ia iloa lona auai mai i Lana ekalesia, ia 'aua le manatu faatauvaa pe māmā i ai se lagona.

O A'OA'OGA MO KERISIANO I NEI ASO

E to'asa le Atua i le faafofoga. O le amio faafaesai o a le Lotu Iutaia, ne'i pipisi atu i le faaKerisiano. Le faatagā foliga lelei mai fafo a e ese le tagata moni i totonu. E faitaga faaleagaga mai i foliga vaaia, ae pi'opi'o ma pepelo i totonu. E tautala mai i upu paia, a e natia agasala e le'i faailoa ma salamō ai. E toatele tagata ua atamamai e faafofoga amiotonu i le lautele, a o le lotoifale i totonu e mamao ese le isi olaga o ola ai. E lē faase'eina le Atua, e lē se'etia ai le Atua i ni foliga. E silasila o Ia i le loto.

“Ia outou ma le mea faafefete a le au faesai, o le faafiaamiotonu lea. Auā e leai se mea o loo ufiufitia, e lē fa'aalia; e leai foi se mea lilo e le faailoaina.” Luka 12:1-2.

O agasala lilo e lē mafai ona saga lilo pea – e silafia e le Atua mea uma. Na manatu Anania ma Safaira e leai se tasi na te silafia. Peitai na silasila le Lagi. Na silafia e le Atua. E toatele tagata faatuatua e manatu o pepelo natia, o mea pi'opi'o natia, o amioga leaga lilo ma taupulepulega lilo, e saogalemu uma auā o loo lilo i le vaai a tagata, latou te lē o iloa mai. Peitai o mea e natia i le lalolagi e matala ma folasia i luma o le Atua.

“E le lilo foi se tasi mea na faia i ona luma, a ua taatia fua ma ua aliali mai, o mea uma lava i lana silafaga, tatou te ta'u atu ia te Ia a tatou amio.” Eperu 4:13.

O le fefe i tagata na te faaleagaina le toatele. Aiseā na la'ua pepelo ai? Atonu sa manana'o e faitauina i la'ua o tagata e agalelei e pei o isi. Na manana'o ia ta'uleleia, ia viia e tagata. Na manana'o ia foliga lelei faaleagaga e sili atu nai lo la'ua tagata moni o loo i ai. E toatele tagata faatuatua o aso nei o loo tigaina ma puapuagatia ona o loo ola mo se ta'uleleia e tagata.

E tatalo ina ia iloa mai. E foa'i ina ia ta'uleleia. E saunoa ma fetalai ina ia amanaia. E la'ei ina ia faafofo tagata. E molimau ina ia faatauvā. Pe afai e faataua ma faasili atu le faafoliga, le kopi poo le ata, nai lo tagata moni, ona lata mai lea o le faaumatia. *“O le fefe i tagata e tupu ai le mailei; a o le faatuatua i le Alii e faamamaluina o ia.” Faataoto 29:25.* E mata'utia le i'uga, o le malilie faatasi e fai le agasala. O le tane ma le avā na loto gatasi e faavalea; ua faaluaina, faateleina lona mata'utia. O se faiga paaga e faamalosia ai e le tasi le isi ina ia pepelo, faa'ole'ole, faasesē, faalata ma faatosina, olegia ma soo se faiga lē amiotonu, o se faiga paaga lena e i'u leaga, e faalumaina i luma o tagata ma le silafaga a le Atua. Ia 'aua lava ne'i e fa'aaogā sesē lou alofa, e fai ma pasese o lou auai i mea leaga.

“³E feoa'i faatasi ea se toalua, pe a le loto gatasi i laua?” Aмоса 3.

E paia le Atua i soo se auga tupulaga. E fesili nisi pe aiseā na vave ai le faamasinoga o Anania ma Safaira? Ona sa finagalo le Alii ia vave faamautū le tāua o lona paia, i le amataga o le Ekalesia. Pe afai e amata e le Atua se mea fou, e masani ona la faailoa manino ana aiaiga ma tuutuuga, ina ia manino i ai tagata uma. Sa faapea foi ona tutupu i isi taimi o le Feagaiga Tuai. Ina ua avatu e Natapu ma Aviu le taulaga, o le afi e ese mai lea na poloa'i ai le Alii, ona vave oo mai ai lea o le faamasinoga ma lo la'ua i'uga, na oti ai i la'ua i lea lava taimi (Levitiko 10:1-3). Ina ua faatamala foi Usa ma na pa'i i le Atolaau a le Alii, na fasia o ia ma oti ai i lea lava ituaso i lea lava mea (2 Samuelu 6:6-7).

Ina ua pepelo Anania ma Safaira i le si'osi'omaga o le Toe Fuata'iina, na vave ona oo mai le faamasinoga. Na faailoa e le Atua, ia 'aua ne'i ulagia lona auai mai. *“⁷Aua ne'i faaseseina outou, e lē ulagia le Atua, auā o le mea e lūlūina e le tagata, o le mea lava lea e seleseleina mai ai e ia.” Kalatia 6.*

O SE FEAU MO KERISIANO O ASO NEI

E ui ina o tagata agasala e lē pa'u'ū ifo ma maliliu faaletino i le taimi lava lea, peitai o le oti faaleagaga ma ona tuatuagia e tutupu i aso taitasi.

O nisi e leiloa le filemu i le taimi lava lea. O nisi e leiloa le amanaia ma le faatauaina i lea lava taimi. O nisi e leiloa le fesootaiga ma le Agaga Paia. O nisi o le faatuatua; o nisi o le avanoa fa'auro, a o nisi foi o le afi faaleagaga. O le agasala na te tauave tuatuagia, pe vave aliali mai pe leai foi. Aua le ta'useseina le faatuai mai o le faamasinoga, e faapea

ai ua ta'uleleia e le lagi lau mea leaga. Fai mai le Failauga 8, *“¹¹Auā ua lē vave faaootia le sala i le amio leaga, o le mea lea ua matuā naunau ai loto o tagata e fai mea leaga.”*

E FAAPEFEA ONA E ALOFIA LE I'UGA O ANANIA MA SAFAIRA?

Ia faamaoni i le Atua. Aua le faafoliga i luma o le Atua, na te silafia manino oe. E mafai e le Atua ona faamaloloina pe afai e te ta'utino atu, peitai o mea e te natia o le a faatamaia ai oe. Ia e soifua se olaga e tasi, a e lē o le lua. Ia tutusa lou soifua faailoa i le lautele, ma lou lava faalotoifale na o oe. Ia sili ona e saili i le mamā, nai lo le fia ta'uta'ua. E sili le faamaoni i nai mea iti ma ta'u faatauvaaaina ai e tagata, nai lo le faalagilagi e tagata i luga o mea pepelo i luma o le Atua.

Ia filifili i sootaga ma faiā e faamalosia ai le amiotonu. Aua ne'i uulima ma se isi e faatino amio leaga.

Ia mata'u faamaoni i le Atua ina ua paia o la i lou loto. O le mata'u i le Atua e puipuia le tagata faatuatua mai fuafuaga ma tonu fai faalilolilo. Fai mai le Faisalamo 86, *“¹¹Le Alii e, ia e faasino mai ia te au lou ala, ou te savali i le mea moni mai ia te oe; ia e faia ina ia tasi lo'u loto e mata'u i lou suafa.”*

O FESILI TAUA MO SOO SE TAGATA FAATUATUA

O e taumafai e te foliga faaleagaga, po o e tuputupu a'e faaleagaga moni? O e gaosia se ata, po o fausia sou tamaliiaga? O e faafiafiaina tagata, po o faamalieina le finagalo o le Atua? O e natia ni mea lilo e tatau ai le salamō?

O le tala lena e le faasino na o ni tagata se toalua i le Tusi Paia. O se fa'ata mo le ekalesia o aso nei. O Anania ma Safaira e le'i maliliu ina ua la natia le tupe. Na maliliu ona ua la faafefiloi le tapuaiga ma le faitogafiti leaga. Na la'ua mananao i le mamalu ae aunoa ma le faamaoni. Na la'ua mananao i se tauleleia aunoa ma le moni. Na mananao i le amanaia faaleagaga ae aunoa ma le faamaoni faaleagaga. O le la tala e lapatai ai soo se auga tupulaga, e taua i le Atua le faamaoni e sili atu i le faalialia, o le mea moni e sili atu nai lo le faatinoga, o le paia e sili i le faafoliga, o le salamo e sili atu nai le tauleleia. O le loto mamā e sili atu nai lo se foliga vaaia teuteuina matagofie.

E finagalo le Atua ia tatou loto maulalo ae le o le mitamita vale. (M ata. 18:4, Iakopo 4: 6) ***E.Tolua***

O LE SULU I VAE MA LE MALAMALAMA I ALA

SOIFUA I LE NUU FOLAFOLAINA

“¹¹Na oo na mea uma ia te i latou e fai ma faailoga; ua tusia foi e fai ma apoapoaiga mo i tatou o e ua aulia mai ai tausaga e gata ai.” 1 Kori. 10:11

Ua tatou masani ma le tala i le faaolataga na faia e le Atua mo lona nuu, a o pologa ai i Aikupito. Ua ave ai Aikupito e fai ma faailoga, o le faatusa o tatou aso sa tatou nofo pologa ai i le agasala. A e ina ua faaola ma faasaolotoina i tatou e Iesu, e ala i lona maliu ma lona toetu manumalo, na Ia aumaia ai le ola fou mo i tatou. O lo tatou NuU Folafolaina, e lē o se laufanua o eleele, mauga ma vaitafe e pei ona i ai Palesitina o le Feagaiga Tuai; a e o nofoaga faaleagaga e moni lona tino mai. O nofoaga lililo ma loloto i totonu o le mafaufau, o loto ma le agaga.

O se soifuaga e pei ona faamatala e le aposetolo, e lē toe toilalo ma faasalaina, *“³⁷a ua tatou manumalo a’ia’i i nei mea uma lava, ona o Ia ua alofa mai ia te i tatou.” Roma 8.* O le ituaiga soifuaga e ui ina fetiaia’i ma lu’itau o tofotofoga eseese, a e malolosi pea. *“¹⁶O le mea lea matou te lē faavaivai ai; auā e ui lava ina tauau ina uma lo matou tagata i fafo, ua faafouina lē i totonu i lea aso ma lea aso.” 2 Kori.4.* O le soifuaga *“e faatumuina ai i le mafanafana, ou te matuā olioli tele lava i lo matou puapuaga uma.” 2 Kori 7:4;* e lē popole ai i se mea e tasi, a e faailoa atu mana’o i le Atua i mea uma lava i le tatalo, ma le faatoga, atoa ma le faafetai (Filipi 4:6), e tatalo i le Agaga i aso uma lava i talotaloga ma faatoga uma, e mataala i mea uma lava, e tausisi e faatoga mo tagata paia uma lava (Efeso 6:18), ma o se olaga *“o mea foi tou te faia, i le tautalatala po o le amio, ia faia uma lava ia mea i le suafa o le Alii o Iesu, ma le faafetai i le Atua le Tama e ala ia te Ia.” Kolose 3:17.*

O loo tusia e le faifeau tusitala Amerika o Meki Lukato: “I Kanana. . . e sili atu ona tatou manumalo nai lo le toilalo, e vave atu ona tatou faamagalalo pe a faatiga mai i tatou, ma avatu faatele pe a tatou maua mea. Tatou te auauna mai lo tatou talenia ma fiafia i a tatou feau ua tuuina mai. Mata tatou te tautevateva, a e tatou te lē matapogia. Tatou te tauivi a e tatou te lē faavaivai. Tatou te mitamita tau lava o Keriso, e faatuatua na o le Atua, faalagolago i le na o Lona

mana. Tatou te olioli i le tele o fua aliali o le faatuatua faatuputeleina.” O Kanana ua fai ma faatusa o lo tatou manumalo e mafai ona maua nei, ma ua valaauina i tatou e le Atua tatou te ulufale atu i ai. E tasi lava lona aiaiga; e tatau ona tatou o ese mai le olaga faataamilomilo i le vao. O la le aposetolo, *“A o outou o le tupulaga ua filifilia outou, o tupu ma ositaulaga, o le nuu paia, , ma le nuu na faatauina mai e le Atua ina ia outou ta’uta’u atu ana galuega lelei - o le na vaalau ia te outou nai le pouliuli e oo i lona lava malamalama e matuā ofo ai.” 1 Peteru 2:9.*

O FAAMANATU PAIA

“⁵⁴Ua ave e Tavita le ulu o le Filisitia, ua aumai i Ierusalem, a o ana mea ua tuu e ia i lona fale ie.” 1 Samu 17.

O taimi uma lava e vaai ai Tavita i mea tau a Koliata o tautau i lona fale ie, o se faamanatu paia ia te ia, e manatua ai le alofa faamaoni o le Atua ia te ia, ma le mana o le Atua sa faa-avanoa mo ia. O le upu ‘manatua’ e lata i le faa250 ona ta’ua i le Tusi Paia. Ma e i ai le mafuaaga. O i tatou e mafuli ina galo mea e tatau ona manatua, a e manatua mea e tatau ona faagalalo.

O le mafuaaga lena o loo fetalai mai ai pea le Atua ina ia fausia fata faitaulaga pe fai maa faamanatu. Na fausia e Iakopo se fata i Peteli, e manatua ai lana miti na suia ai lona olaga (Kenese 28:18-22). Na ave e Isaraelu maa e 12 mai le Ioritana ma fausia ai le fata fai vavega i Kilikala e manatua ai, le sopoia o le Ioritana i le iliti vai matutu, e pei foi ona sa vaeluaina e le Atua o le Sami Ulaula i le taitaiga a Mose na latou sopoia ai (Iosua 4: 20 – 24). Na fausia e Samuelu le fata faitaulaga manumalo i Mesepa ma faaigoa ia ‘Epenesa’ ina ua tali mai le Atua i ana tatalo, ma faatoilalo ai Filisitia ina ua fasia i latou a o ta’apeape i le pa pa o faititili, le taalili tele ma le fe‘emo o uila (1 Samu 7:12). Pe a aunoa ma faamanatu paia, e galo ia i tatou a’oa’oga faaleagaga tatou te a’oa’oina a o tatou malaga.

O loo faamauiina i le 1 Samuelu 17:5, o le mamafa o le ufifatafata o Koliata e 5,000 sekeli o ‘apa memea - e tusa lea ma le 125 i le 140 pauna, po o le 50-60 kilo; e ese mai ai le pulou ‘apa memea, le ufivae

‘apa memea, le tao, le talitā ma le tali pupuni. O taimi uma e siitia ai e Tavita lona fale’ie ma faatū i se isi nofoaga, e ave faatasi ai ma auupega a Koliata, e ui ina mamafa. Aisea? Auā na te aumai sautualua le faamanatu i aso taitasi o le faamaoni o le Atua ia te ia. E le gata i lena a o se faatupu malosi sili mo ia. Po o a lava fili ma autau, feau ma galuega, lu’itau ma tofotofiga o loo taatia mai le lumana’i, ua iloa lelei e Tavita, i le fesoasoani mai o lona Atua, na te mafaia ai ona faafetaia’i soo se fili e pei ona sa ia fasia le toa Filisitia. Ma e lua ni a’oa’oga taua iinei mo i tatou: Muamua, afai na faia e le Atua mo Tavita, na te faia foi mo i tatou. Lua, afai na fai muamua e le Atua, na te toe faia foi.

O LE FA’AAMUIA MUAMUA

“Amuia ē matitiva i le agaga; auā e o latou le malo o le lagi.” Mata 5:3

O le a tonu le uiga o le “mativa i le agaga”? O lenei fuaitau e leai sona sootaga i le ‘mativa’ i mea tau tupe po o tulaga tofi. A e faasino i lou iloa lelei o lou mativa ma le gaogao faaleagaga – a aunoa oe ma le Atua, ua leai foi sou tagata, leai sou ola, leai se mea e tasi e te iloa ma mafaia e maua ai se manuia. O le mativa i le agaga o lona uiga ua e silafia manino, o au amiotonu uma e tusa ma lou lava manatu, ua na o ni ‘ie’ie masaesae, ma o au taumafaiga ma faamanuiaga i lou lava ma’ema’e, o ni mea lē tumau toe pu’upu’u aso e tino mai ai. Fai mai Isaia 64, *“O i matou nei e tusa ma le mea leaga i matou uma; o a matou amiotonu uma e tusa ia ma le ‘ie o le ma’i; ua mamea i matou uma e pei o le lau laau, o a matou amiolē tonu e pei se matagi ua lelea ai i matou.”* O le faamativaina i le agaga o lona uiga ua e iloa e te manaomia le Atua. Aiseā o le a avea ai lea mea ma faamanuiaga? Auā o le a tatala atu ai lou ola e talia le meaalofa foai fua a le Atua, i lana faaolataga ma avanoa ai le Agaga Paia e galue i lou olaga. O le a e naunau e faamaulalo ma tatalo, “Iesu e lo’u Alii, ou te manaomia oe. Ua ou talia oe e avea mo’u Faaola. Ua ou mana’o e tatala atu lo’u loto i lou finagalo ma fai mea uma e tusa ma ou ala ina ia viia ai lou suafa.” Pe afai e te mativa i le agaga, ua e naunau e ta’utino lou mativa masaesae faaleagaga. Ona o lea, e te lafoa’i lou faamaulaluga ma le mitamita vale i le agaga, le mitamita o le loto, i le atamai, ma le olaga atoa, e faataatitia uma i lalo o aao o Iesu. Pe a e mativa i le agaga, ua e tatala atu lou tagata i le alofa tunoa ma le alofa mutimutivale o le Atua faaola. O lona taunuuga

e mulimuli mai, ua e mafai ona ulufale i le Malo o le Atua ma fiafia i ona faamanuiaga uma. *Amuia e matitiva i le agaga; auā e o latou le malo o le lagi*, o lona uiga ua mafai ona e tatalo ma le fiafia, ‘Le Alii e, ua ou ta’utino atu lo’u faalagolago atoatoa i lau Afio.’

O LE FA’AAMUIA LONA LUA

“Amuia e faanoanoa; aua e faamafanafanaina i latou” E ui ina fetau i le fa’aamuiia lenei i taimi e faanoanoa ai ina ua maliliu o tatou tagata, peita’i e sili atu ona talafeagai mo e faanoanoa loloto i a latou amio leaga, auā latou te maua le mafanafana moni mai le Atua. Pe afai e te tagi lotulotu ma auē i lou loto ona o au agasala, ua e tuua oe i se tulaga e te agavaa ai e talia le faamagaloga a le Atua. O le salamō faamaoni e le taula’i ia te oe lava ia. E lē leaga pe inosia; e lē maua mai se loto faatagā faamaulalo faa’ole’ole, pe o ni lagona e lopala i vaivai o le faatāua talofa e i lou tagata. A o le ta’utino atu i le lautele i le gagana faigofie, ua e mana’omia le alofa tunoa ma le alofa mutimutivale o le Atua. Pe afai e te fiafia pea i au agasala sa fai, pe taumafai e ta’ulelei/ta’uamiotonu au mea leaga, pe tuua’i i isi na mafua ai le leaga, e te lē maua se faamagaloga. Se’i vaganā ua e tatalo, “Ou te ta’utino atu ua ou agasala i lau Afio i o’u manatunatuga, o a’u upu ma faamatalaga, ma a’u faatinoga”, e te tuu ai oe i se tulaga e faamamāina mai au agasala.

O la le aposetolo o Ioane, *“Afai tatou te faapea, E leai sa tatou agasala, ua sesē ai i tatou ia i tatou, e le o i totonu ia te i tatou le upu moni; a e afai tatou te ta’u atu a tatou agasala, e faamaoni o Ia, ma le amiotonu e faamagaloga ai a tatou agasala, ma faamamā mai ia i tatou i amioletonu uma lava.”* 1 Ioa 1:8-9. Ma o lou faamafanafanaina lena! O le faamagaloga a le Atua na te aumaia le olioli moni ma le fiafia loloto, le mafanafana sili i o tatou loto. O le faamagaloga a le Atua na te faamaloloina o tatou manu’a ogaoga ma loloto i totonu, ma na toe faafoisia i tatou i le mafutaga vavalalata ma lo tatou Tama i le Lagi. Fai mai le ta’utinoga a Tavita, *“Ona ou faailoa atu ai lea ia te oe o la’u agasala, na ou le ufitia foi la’u amioletonu; sa ou faapea, Ou te fa’aali atu i le Alii o’u solitulafono; ona e aveesea ai lea o le leaga o la’u agasala.”* Sala 32:5.

TALA O E UA FAI I LAGILE FOLAUGA

ORISKA ALIITASI FILIPO SAMANIA.

1/2/1980 – 26/3/2026

O le Afioga i le Faletua o le A’oa’o Fesoasoani, po o le Tina ia Oriska Aliitasi Filipino Samania, na soifua mai le Aso Faraile 1 Fepuari 1980, a ua valaauina e lona Matai i le Aso Tofi, 26 Mati 2026. Ua atoa ai le 46 tausaga, 1 masina ma le 25 aso o lona soifua. Sa Papatisoina i le Aso 12 Oketopa 1980, a e sa faaofia e avea ma tagata Ekalesia i le masina o Me, tausaga 1992. Sa faaipoipo atu ia Agaseata Filipino i le Aso Toonai 9 Mati 2002. Sa faaetia lo la Tofi Tiakono i le Aso Lulu, 2 Setema 2020.

Sa faamanuiaina ma faamaonia lo la tofi A’oa’o Fesoasoani ia Ianuari o le tausaga nei 2026. Lea faatoa 2 masina talu ona faapaleina i le Tofi Aoa Fesoasoani, a o lea ua fuli mai lona tua. O upu o le pese 147 a le EFKS e faapea, “*Ia fai so’u aoga, Mo oe Iesu, E olioli a’u, ma filemu.*” O le molimau lea i le ola faaleagaga o le faletua, she is a dedicated Christian, she is a committed Christian. O se tagata e toaga i le lotu taeao ma le afiafi o Aso Sa, e o’o foi i Mafutaga Tatalo a le Aulotu i afiafi o Aso Lulu, faapea foi Lotu Au Leoleo i vaveao o Aso Toonai. O se faailoga lea e faamaonia ai upu o le pese, *Ia fai so’u aoga, mo oe Iesu, e olioli a’u ma filemu.* O le olioli ma le filemu lea sa ia Aliitasi, na ofoina ai lona ola e vivii ai i le Alii i soo se tapuaiga faitele, lea lava ua faapaleina ai i laua i le Tofi Aoa Fesoasoani. O ia o se tasi o le Mafutaga a le Aufaigaluega Faifeau, A’oa’o ma Faletua, o se sui o le Mafutaga a Tina, o se sui o le Autalavou, o se sui foi o le Aufaipese e pele ia te ia. E leai sona tulaga tofi i nei faalapotopotoga uma, a e o le faletua e moni ai le muagagana lea, *behind the scene*. O mea e tutupu i tua atu o le vaaiga a tagata, o mea e le o iloa pe vaaia e le toatele, a e tāua tele i le iuga e aliali mai. O ana galuega ia na faia i le filemu ma le olioli, e lē iloa mai e isi tagata. E lē fia mata-muamua ma fia iloa atu i luma i le vaaiga a tagata. *She really works behind the scenes.*

E ui lava ua vave faamanavaina ana feau i le 46 tausaga o lona soifua, a e ou te talitonu “e tāua atu le *quality of life* nai lo o le *quantity of life*” E sili atu le ola i se olaga puupuu e i ai lona uiga, fiafia, olioli ma le filemu, nai lo o le na o le umi o tausaga e ola ai, a e aunoa ma nei vaega tāua o le ola faaleagaga.

O ona toe sauniga na faia ile 9.00am, Aso Faraile 10 Aperila 2026, i le malumalu a lana Ekalesia EFKS i Vaivase-Tai. O le Susuga ia Misioka Tanielu (AM)

na faaulufaleina lona sa, o le Faitauina o le Tusi Paia sa fofogaina e le Susuga ia Leefu Pule (FS), a o Talosaga sa faaleoina e Malotau Lafolafoga (FS), a o a’u sa ta’ita’i ma saunia lona molimau faaleagaga faapea ma le feau faamafanafana. Sa filifilia ai le Tusi o le faasinoga a le Tusi Faitau Aso, Neemia 9:17, “*A o oe o le Atua, o lē faamagaloina sala, o lē alofa fua, ma lē alofa mutimutivale.*” Sa faatauina ai pea le mafauauga faaleagaga o lea aso, **O le loloto o le Faamagaloga a le Atua (*The depth of divine forgiveness*).**

O le faamagaloga a le Atua, e lē pei o le faamagaloga a le tagata. Aisea? E i ai tapulaa o le lotu o le tagata, e a? e faigofie ona ita, e faigata ona faagalo mea sesē, masani foi ona umi se taimi e toe faaleleia ai mafutaga. A e o le Atua, e ese lava lona natura, e a? O lana faamagaloga e loloto, e lautele, ma e lē gata foi. E pei ona faamagaloga e le Atua Isaraelu i a latou agasala pei o le faitauga o lenei aso, e faapena foi lona alofa i le faletua ia Tasi, pei ona tatou faamavae atu ai nei. E leai a se tagata e atoatoa, e i ai lava o tatou vaivaiga ma sesē. Afai sa i ai ni ona vaivaiga—ua ufitia e le faamagaloga a le Atua. Afai sa i ai ni ona sesē ma faaletonu—ua faamamāina e Lona alofa tunoa. Lona uiga, e loloto le alofa ma le faamagaloga a le Atua, nai lo o a tatou agasala.

O le feau faamafanafana lea, Ia tatou talitonu i le loloto o le faamagaloga a le Atua – E leai lava se agasala e sili atu nai lo o lona alofa. Ia saunia o tatou ola, auā tatou te lē iloa foi o tatou itu aso. Ia tatou alolofa ma faamagaloga le tasi i le isi, a o i ai pea le avanoa. Tatou lotu tetele, e ui lava o le a lē toe vaaia Tasi i le tino nei, a e o lona alofa, ana aoaoga, ma ana galuega lelei, o le a tumau pea i o tatou lotu.

Tatou pipii mau pea i le Atua, aisea? Auā e loloto lana faamagaloga, ma e telē foi lona alofa, e faamafanafanaina ai i tatou, a o tatou faamavae atu i le faletua ia Aliitasi. Pei lava ona fai mai Iopu “*E, ana mafaia ona finau o le tagata ma le Atua, e pei ona finau o le tagata ma lana uo. Auā e mavae mai nai tausaga ua faitaulia, ona ou alu atu ai lea, i le ala ou te lē toe foi mai ai.*”

Na mae’a ona toe sauniga, ona lagomau lea i lona oliolisaga tumau i le fanua tanu i Magiagi. Manuia lau malaga Oriska Aliitasi Filipino Samania.

Saunia susuga Seilala Seilala (FS)
EFKS Vaivase-Tai
VAIMAUGA.

LAUMATIA CHARLIE PE'O

SMALLEY

12/10/1934 – 16/3/2026

O le afioga ia Laumatia Charlie Pe'o Smalley, o le tiakono o le EFKS Canterbury, Pulega Sini i Saute, Matagaluega Niusauelese, Ausetalia. Na soifua mai o ia i le Aso Faraile, 12 Oketopa 1934, a e na valaauina e le Atua i le Aso Gafua, 16 Mati 2026, i le Maota gasegase i Bankstown. Ua atoa ai le 91 tausaga, 5 masina ma aso e 4, o lona soifua. Na matou galulue i le aso 10 Iuni 2017 ma lona faletua, a e maliu ua nofo toatasi, i le maota o tagata matutua i Bass Hill, NSW. O le tamā, na galulue i le EFKS Mangere East i Aukilani, ma liliu mai ai ma lona faletua ma lo la'ua tofi tiakono, ma matou galulue ai i Ausetalia. O se tamā e ui i lona soifua matua, ua 82 tausaga matou galulue, a e po o le a le mamao sa alaala ai, a e susū mai lava e auai. E pu'e lana pasi i le station, pu'e le train, toe pu'e le isi pasi, faato'a oo mai i lo matou fale. E pu'e foi le pasi e sau ai i le lotu. O nisi taimi e maua le lifi e sau ai i le lotu. Ua lava lena e iloa ai lona soifua ofoina ma lona loto i le Atua ma lana galuega.

Na soifua i le penefiti, a e le misi le tele o galuega tautupe a le Aulotu, o Faiga taulaga faapea le Alofa o le faifeau. O lona soifua lea na ma faasoa ai, ma ia faailoa ai nisi o taitai o le Ekalesia aoao, pei o le Toeaina ia Oka Fauolo FT sa latou mafuta i lona maota i taimi e malaga mai ai, a o i ai i Aukilani. O se tasi o Toeulutaia na auai i le tau amataina o le Ekalesia EFKS i Aukilani i Niu Sila. Talofa i le faigata ua feagai ma nai matua, ua lolotu ese uma fanau, a e na le aveesea ai o laua loto i le Ekalesia na faavae mai ai o latou soifua. O le tasi lea o faigata matuiā tele, ua feagai ma nai matua i atunuu mamao.

Na ou ta'ita'iina lona Toe Sauniga i le malumalu o le Fanuatanu o Forest Lawn Memorial Park, Leppington, New South Wales, a e na faaulufaleina lona sa e le Faifeau o Pao Pele. Faafetai i le Atua i lana meaalofo tatau o le oti, e mapu ma malolo ai ona tagata paia. Tofa filemu ia lau afioga i le Tiakono, Laumatia Smalley, i aao agalelei o lou Matai na e galue ai mo lona finagalo i lalo nei. *Salamo 116:15, "E silisili i le manatu o le Atua, le oti o ona tagata amio Atua. (Precious in the sight of the Lord, is the death of his saints)."*

Saunia Susuga Iakopo M. Leleimalefaga FT,
EFKS Canterbury, Pulega Sini i Saute,
Matagaluega NIUSAUELESE.

TALA MO TAMAITI

Na feiloa'i se tasi alii talavou ma se tamā matua. Na fesili le alii talavou, "E te manatua a'u?" Na tali le toeaina, "E leai, ou te lē iloa, pe manatuaina oe." Ona fai atu lea o le taule'ale'a, "O a'u o se tasi o lau vasega." Fai atu le toeaina, "Oi, e moni? O le a la lau mea o fai nei?" "O lea ou te faiaoga," na fai atu ai le talavou. "Faia'oga? Manaia tele! E pei o a'u?" na fai atu ai le toeaina. "Ioe. Na ou mana'o e fai ma faia'oga, e fia pei o oe; ona o lau faata'ita'iga lelei na faaosofia ai a'u." Na manatunatu teisi le toeaina, ona fesili atu lea, poo le a le taimi na faaosofia ai o ia? Na faamatala ai lea e le talavou lana tala e faapea: O se tasi aso, na sau ai se tasi o a'u uo ma sana uati fou i le a'oga. Na ou mana'o lava i ai, ona ou gaoia lea o le uati mai le taga o lona ofu. Na iloa e la'u uo ua gaoia lana uati, ona alu atu lea ua ta'u atu ia te oe. Ona e fai atu lea i le vasega: E i ai le uati ua gaoia a o fai le mataupu. O ai na ia avefa le uati, faamolemole toe faafoi mai. Peitai, ou te le'i faafoia le uati. Sa ou mā tele, ne'i iloa e le vasega. Ona e tapuni lea o le faitoto'a ma fai mai, ia matou tutū uma i luga. Na e fai mai o le a siaki taga o matou ofu e su'e le uati seia maua. Peitai na e fai mai foi, ina ia tapuni pe moe'i'ini uma o matou mata a o su'e le uati.

Ma sa faapena lava ona fai. Sa e siakiina taitasi taga o matou ofu. Ina ua e oo mai ia te a'u, sa e su'e la'u taga, ma maua ai le uati ma aveese loa. Peita'i e le'i uma ai le su'ega o le uati, e te le'i faatali pe taofia ai. Sa e fa'auau pea ona su'e i taga a isi tamaiti uma. Ina ua uma, ona e fai mai lea, "Ia pupula outou mata, o lea ua maua le uati." E te le'i fai mai se tala ia te a'u, pe otegia, pe faasala; e te le'i faailoa foi i se isi tagata o a'u lea sa gaoia le uati. O le aso lena, o se aso aupito masiasi o lo'u olaga. A o se aso foi sa lavea'iina ai a'u mai le savalia ma mulimuli atu i se auala sesē. E te le'i a'oa'iina pe faatonu mai a'u, a o lau gaioiga ma lau faatinoga sa fai, e sili atu ona leotele nai lo ni upu ma tala. O le aso lena, na ou malamalama ai i le uiga tonu o le avefa ma faia'oga. Ma o le ala lena ua ou filifili ai e fai ma faiaoga.

E te manatua le aso lena, Faia'oga? Na tali atu le toeaina: Ioe, ou te manatua le mea na tupu, le su'ega o le uati, peita'i ou te lē manatuaina oe, auā sa pupuni foi o'u mata i lena taimi i lena aso. O le tala lena tamaiti. O se a'oa'oga mo outou, i le uiga tonu o le a'oa'o ma faiaoga moni: Pe afai o lou faasa'o atu o se isi tagata, e faamasiasi ai lena tagata, sa sili ai ona 'aua le faasa'oa fua; ma e iloa ai, e te lē iloa foi ona fai ma faia'oga. Ma le isi, 'aua e te faia soo se mea sesē, auā e leai se mea e lilo i le silafaga a le Atua; e i ai lava le auala e faailoa ai oe, ona e masiasi ai lea. A e afai foi e te faia se agasala, ia vave ona salamo ma faailoa, e alofa Iesu ma faamagalalo ia te oe. **FT**

POLOITE LAUFISO AIOFAIVA

USUFONO

(8/10/1959 - 17/1/2026)

O le afioga i le Tiakono o le EFKS Leulumoega, Pulega Alofi i le Matagaluega Aana. Na soifua mai i le Aso Tofi, 8 Oketopa 1959, a e na faamanavaina e le Atua ana feau i le Aso Toonai 17 Ianuari 2026. Ua atoa ai le 66 tausaga, 3 masina ma aso e 10 o lona soifua. Sa ou faaipoipoina i la'ua ma Toa si ona faletua i le masina o Oketopa i le tausaga 1997. E to'a 11 le fanau, to'a 31 fanau a lana fanau, ma le to'a 2 fanau a fanu a lana fanau (to'a 44 na tutupu mai ai). O se aiga uluola ma toatele o faamanuiaga mai le Atua. Sa faae'etia i le tofi Tiakono i le masina o Mati tausaga e 2019. O se auuuna fia taumafai atili i le finagalo o le Alii. E ui i le lima vaivai a e sa faamalosi ma galue pea i le auuunaina o lona tofi.

O le Aso Sa, 25 Ianuari lona sauniga faaleaiga, na ta'ita'ia e le susuga Peniamina Neueli FS. A o le Aso Gafua, 26 Ianuari ona toe sauniga. Na faaulufale atu lona sa e Peniamina Neueli FS ma ia tauaoina talosaga, a o le susuga Tausi Matagaluega Metotisi ia Isaako Vaisagote na ia faia le Upu faamafanafana ma faamalosi mo e uma na auai; aemaise le tina ma le nofoaalo loto faavauvau. O a'u na ta'ita'i ma faia le molimau o lona soifua faaleagaga.

Na fa'aautū la'u molimau i le Tusi o Fa'aaliga 2:9, *“Ua ou iloa au galuega, ma lou puapuaga, ma lou mativa, a ua e tamaoiga...Ia e faamaoni seia oo i le oti, ona ou avatu ai lea ia te oe le pale o le ola.”* O le tumau seia oo i le oti, e maua ai le pale o le ola; o le taui lea o le tagata faalogo ma usitai i le fetalaiga a Iesu, e 'aua le fefe pe solomuli. O le pale o le ola, o se faaupuga e maua mai i taaloga o le Olimipeka na amata e tagata Eleni, ma fa'aauuina e pulega a Roma, i le seneturi muamua. O le pale lea e fai i lālā o laau ola ma ona fugalaau. O le mafuaaga lea e ta'ua ai o le pale o le ola – e fanafanau ma uluola ona o loo faia mai le natura o laau ola o le foafoaga (fertility). O le pale lea e faapale ai se tagata taalo e manumalo i se tuuga tamo'e o taaloga o le Olimipeka o le Seneturi Muamua. E le o se pine auro e pei ona ua i ai nei aso. O le ola lausiusi o laau ma fuga o laau ua faia ai le pale ua faapaleina ai le tagata manumalo, o le ata lea o le ola pea o lona manumalo. O le manumalo e faavavau. Ma o le ata lea o le pale o le ola, e pale ai le tagata e tumau lana molimau i le Atua, i le tamoega faale-faatuatua,

e feagai pea ma faigata o le ola (notes by Prof. Dr. Vaitusi Nofoaiga FS).

Ua faafetai le tautua i lau afioga i le Tiakono; alu atu ia ma le fiafia e feiloai ma lou Matai, o loo faatali mai. Manuia tele lau malaga.

Saunia Susuga Tunupopo Patu FS,
EFKS Leulumoega, Pulega Alofi,
Matagaluega AANA.

LETAUA RASELA IFOPO

ASAILEVAI

(21/10/1955 - 21/2/2026)

O lona aso soifua o le Aso Faraile, 21 Oketopa 1955, ma ua tusa nei ma le 70 tausaga, 4 masina ma le aso e tasi le matua o lona soifua. Na amia e lona Matai i le Aso Toonai, 21 Fepuari 2026. O ia o le Faletua o le alii Tiakono, ma o i la'ua ma lona alii e afioga ia Ifopo Asailevai, o le uluai tiakono lava lea na faaetia lo laua tofi, talu ona ma avea ma faifeau o le EFKS Leulumoega nei i le tausaga 1996. O leni ua silia ma le 29 tausaga o lo la'ua tofi.

O le Aso Tofi, 5 Mati i le 5pm lona sauniga faaleaiga, ma sa tatalo mai lava ou te taitaia, e ui ina sa auai mai nisi o taulaga soifua o le aiga. O le Aso Toonai, 7 Mati i le 11am lona toe sauniga. O a'u sa ta'ita'i ma faaulufale atu lona sa, o le Tausi Matagaluega Metotisi ia Isaako sa feagai ma tatalo, a o le afioga i le Tiakono Katoliko o Penitito sa faia le Upu faamafanafana.

Na ou faia le molimau faaleagaga, ma sa fa'aautū i le Faataoto 31:28, *“E tula'i mai lana fanau ma faafetai ia te ia; o lana tane foi ua vivii ia te ia.”* O se tina e auu lona loto i si ana fanau, e naunau lava ina ia lelei ma manuia lo latou aiga i le lumanai. O se tina e loto maulalo, e le gaoiā ma e tumu foi i le alofa. Ua leva ona feagai ma gasegase, a e le'i faavaivai ai.

Rasela, sau ia e alu, o lea ua valaau mai lou Alii, alu atu ia i le nuu e galo ai tiga. Ia manuia lau malaga.

Sauniga Susuga Tunupopo Patu FS,
EFKS Leulumoega, Pulega Alofi,
Matagaluega AANA.

LEALI'IE'E PITOLUA TEREISE

VAIFALE (Tina Penisione)

(11/12/1934 – 15/2/2026)

Na soifua mai i le Aso Lua, 11/12/1934, a e maliu i le Aso Sa, 15/02/2026. Ua 91 tausaga, 2 masina ma aso e 4, le matua o lona soifua. Na soifua mai le Tinā i ona matua: o le Tamā Faifeau Si'ū Toelupe ma le faletua ia Tereise Si'ū Toelupe i le afioaga o Vailuutai, a o galulue ai ona matua o le Faafeagaiga EFKS Vailuutai i lona taimi. O lona soifua tuputupu a'e, o lona tamā lava le susuga i le faifeau ia Si'ū sa faafaiileina mai lona olaga faaleagaga ma faekalesiaina.

Sa a'oa'oina o ia i le Malifa Girls i Malifa, ma agai ai i le Kolisi o Samoa. O ia o se tasi o teine aoga na faavaeina le Kolisi o Samoa i le tausaga 1953. Na ulufale o ia i le Aoga FaaFaiaoga i Malifa ina ua i'ū mai le Kolisi o Samoa, ma avea ai o ia o se tasi o faiaoga a le Malo o Samoa mo tausaga e tele. A o i ai i le Aoga Faa-faiaoga i lona vaitaimi, na mafuta ai ma lana uo o Taiese Luteru Vaifale, ma faaipoipo ai i le tausaga 1962.

1967 – 1971: Ulufale i laua i le Kolisi Faafaifeau i Malua. Avea ai o ia ma Faletua o le Faafeagaiga.

1971 – 1976: Tausinuu EFKS Foua Salelologa.

1976 – 1980: Faiaoga i le Kolisi Leulumoega Fou.

1980 – 1986: Siitia i NZ ma avea ma Faifeau Tausinuu EFKS Wainuiomata, Ueligitone.

1986 – 2003: Ae faaii i Ausetalia, galulue ai i le EFKS Balmain – Rooty Hill, Matagaluega Niusaelese.

A o i ai i le galuega i NZ, sa ulufale o ia Kolisi Faafaiaoga a Niu Sila, ma avea ai o ia o se tasi o faiaoga a le malo o Niu Sila, galue ai o le faiaoga i aoga Primary School i Wainuiomata, Wellington. Sa faapea foi ona galue o ia o le faiaoga a le malo o Ausetalia, sa fesoasoani tele lea mo le la aiga aemaise le tau atia'e o ekalesia sa galulue ai i Niu Sila ma Ausetalia i na vaitaimi. O se Tina ua iloga i le Ekalesia lana auunaga i lana taleni o le a'oa'o o fanau a le Ekalesia, aemaise foi fanau a Samoa.

O se Tina e talenia foi i taaloga i lona soifua talavou, sa avea o ia ma sui filifilia o le au Netball a Samoa, 1957 – 1958; sa malaga i le tauvaga faa va o malo sa faia i Fiti. O le masina o Aperila 2003, na maliu ai lona to'alua, le Tamā Faifeau ia Luteru Taiese Vaifale, o le vaitaimi foi lea ua mapu ane o ia mai le galuega. Peitai, sa fa'aauau pea lana tautua ma lana auunaga i le Ekalesia, o le Tina Penisione i totonu o lana

Aulotu, Pulega ma le Matagaluega, seia oo ina valaauina e lona Matai.

E 22 tausaga sa tautua ma galue ai pea, mo le atia'eina o le Ekalesia, sa le mapu lana auunaga faa Tina, fautua tuualalo i le Mafutaga Tina, faapea foi le a'oa'oina o fanau a le Ekalesia i le Aoga Aso Sa ma le Aoga a le Faifeau. O le masina o Aukuso, 2014, sa faasuafaina ai o ia i le suafa 'Lealiiee' i lona aiga i Saleilua Falealili. O le aso Sa 15/02/2026 i le itula 1.35pm, na faamanavaina ai e le Atua lona soifua, ma moe filemu ai o ia i aao o lona Matai, i lona maota lava i Sini Ausetalia.

O ona toe sauniga sa faia uma lava i le Malumalu EFKS Rooty Hill. O lona Sauniga faale Aiga, sa faia Aso Sa, 20/2/2026 i le 4 i le afiafi, sa taitaia lava e taulaga soifua a lona aiga. O lona toe sauniga sa faia i le Aso Lua 24/02/2026 i le itula 9 i le taeao. Sa taitai le Susuga i le Toeaina Saifoloi Saifoloi FT Pulega Sini Tutotonu. O le Upu Faamafanafana sa saunia e le susuga Faafeagaiga ia Okesaita Iosia, o Talosaga sa nafa lea ma le Susuga i le Faafeagaiga ia Falani Tofilau. Sa molimau le susuga i le Toeaina Faatonu Simeona Taefu, e fai ma sui o le Matagaluega Niusaelese i Sisifo. O se sauniga sa faatumulia i le paia maualuga o le Aufaigaluega a le Atua, susuga i Toeaiina ma faletua, faapea le mamalu o le Matagaluega Niusaelese i Sisifo, i susuga i Faafeagaiga ma faletua i le nofo-a Pulega o le faletolu o le Matagaluega. Ua tu mati'e le toe sauniga o le Tina malolo i le auai mai ma tatou molimauina faatasi lona toe taimi i le fogaeleele. Ona faaii ai lea o le sauniga i lona oliolisaga tumau i Pine Grove Memorial Park, Minchinbury, sa ou taitaiina lona toe sauniga. Amuia lenei Tina, e valaau mai lona Matai, a o loo faapena ona ia fai.

O la le aposetolo o nuu ese, *“Ua ou tau le taua lelei, ua iu ia te a'u le taunisioga, ua ou taofi i le faatuatua”*. A o la Solomona le potu, *O le Tinā ua mata'u i le Alii, e viia lava o ia. Avatu ia te ia le fua o ona lima, o ana galuega foi, e viia ai o ia i faitotoa i le malo i le lagi*. Faafetai tele Tina i galuega lelei uma sa e galue ai. E le galo oe i o matou loto. Manuia lau malaga Tina! Ia maua sou nofoaga mau i le malo i le lagi.

Saunia Susuga Uikilifi Vaifale FS
Faafeagaiga EFKS Rooty Hill,
Pulega Sini Tutotonu,
Matagaluega NIUSAUELESE.

ATA O E UA MALILIU & TALA TUSIA


LEALIE'E TEREISE
LUTERU VAIFALE



POLOITE LAUFISO AIOFAIVA
USUFONO POLO



LAUMATIA CHARLIE
PE'O SMALLEY



LETAUA RASELA ASAILEVAI



ORISKA ALIITASI
FILIPO SAMANIA



MALUMALU FOU EFKS
SALEILUA, FALEALILI

